

ANG

Bayan

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLII Blg. 6  
Marso 21, 2011  
www.philippinerevolution.net

Editorial

## Kundenahin ang imperyalistang gerang agresyon sa Libya

**I**sang gerang agresyon laban sa bansang Libya ang inilunsad ng mga imperyalistang kapangyarihan. Walang pakundangan ang pag-yurak sa pambansang kasarinlan at karapatan ng mamamayan ng Libya na magpasya sa sarili nang isagawa ng US, France, United Kingdom at iba pang bansa ang pagpapaulan ng mga bomba sa syudad ng Benghazi nitong Marso 19 sa layuning pabagsakin ang rehimen ni Moammar Gadaffi.

Ang pambobomba ay isinagawa matapos ilabas ng UN Security Council ang resolusyon na pagbawalan ang paglipad sa himpapawid ng Libya. Binuo ang resolusyong iyon sa layuning hadlangan ang gubyernong Gadaffi na gapiin ang armadong pag-aaklas ng ilang rebeldeng grupong suportado ng US.

Sinimulan ang armadong pag-aaklas na ito noong kalagitnaan ng Pebrero. Sa suporta ng US, tinangkang sakyan ng mga armadong rebeldeng ito ang mga demokratikong kilos-protesta at malalaking demonstrasyon sa North Africa at Middle East at magupat ng mga katulad na paglaban sa Libya.


Matapos ang ilang linggo, nabigo ang mga ito na ulitin sa Libya ang mga dambuhalang demonstrasyon noong Enero at Pebrero sa Egypt at Tunisia na nagpabagsak sa mga gubyerno ro-

gubyernong Gadaffi ay nalimita sa pag-aaklas ng maliliit na grupo ng mga armadong rebelde na naging madaling target ng kontra-opensiba ng mga pwersa ng gubyerno ni Gadaffi.

Matapos mapaatras ang mga armadong rebeldeng ito sa ilang kuta nito sa Benghazi, nagpasya ang US at ang mga imperyalistang bansa na tuwiran nang manghimasok at maglunsad ng gerang agresyon laban sa Libya. Sa unang larga ng imperyalistang gerang agresyon, nagpaulan ng daan-daang *missile* mula sa mga barkong pandigma na nakaistasyon sa Mediterranean Sea at nagpalipad ng mga *jet fighter* sa himpapawid ng Libya.

Matagal nang nais ng US na pabagsakin ang gubyerno ni Gadaffi. Ang gubyernong ito ay isa sa ilang gubyerno sa buong mundo na tumitindig para sa pambansang kasarinlan at lumalaban sa imperyalistang patakaran ng globalisasyong neoliberal. Nagkakaisa ang mga imperyalista sa layuning wakasan ang paghahari ng gubyernong Gadaffi. Lahat ng mga imperyalistang bansa ay nakiisa at sumusuporta sa gerang agresyon at nag-aambag sa armadong pagsalakay sa Libya.

Sa kabilang panig, ang pagkakaisang ito ng mga imperyalista ay tanda rin ng kawalan nila ng tiwala sa isa't isa. Nag-uunahan ang mga imperyalistang kapangyarihan sa pagpwesto ng sarili bilang nakaiimpluwensyang kapangyarihan sa Libya sakaling magtagumpay ang layunin ng kanilang gerang agresyon na pabagsakin ang gubyerno ni Gadaffi.



on. Kalau-  
nan, ang  
paglaban sa

**Mga tampok sa  
isyung ito...**

Operation Odyssey  
Dawn PAHINA 3

Labanan ang rehimen-  
ng US-Aquino PAHINA 5

Ika-100 Araw ng  
Kababaihang  
Anakpawis, ginunita  
PAHINA 11

Ang paglulunsad ng gerang agresyon sa Libya ay tanda ng patuloy na lumalalang krisis ng pandaigdigang sistemang kapitalista. Ang tangkang pabagsakin ang gubyrerno ni Gadaffi ay bahagi ng imperyalistang layunin na pairalin sa buong mundo ang patakaran ng globalisasyong neoliberal. Imbing layunin nito ang dambungin ang yamang langis ng Libya at bigyan ng buong laya ang mga monopolyo kapitalista na mamuhunan at kontrolin ang pamilihan doon.

Pinanghihimasukan ng US at iba pang mga imperyalistang kapangyarihan ang iba't ibang mga bansa na dumaranas ng pampulitikang kaguluhan sa layuning itayo sa mga bansang ito ang mga papet na gubyernong magpapatupad ng mga patakarang pabor sa mga imperyalista.

Ang muling paglulunsad ng US ng gerang agresyon ay tiyak na pagbabayaran ng rehimeng Obama at ng iba pang imperyalistang kapangyarihan. Sa harap ng tuluy-tuloy na mga kabiguan at malalaking kaswalti ng US sa di matapos-tapos na gerang agresyon nito sa Afghanistan at Iraq, malawakan ang pagtutol ng mamamayang Amerikano sa paglulunsad ng gerang panghihimasok sa Libya.

Ang armadong agresyon ng mga imperyalista sa Libya ay magpapaalab ng patriyotismo ng mamamayan ng Libya at magtutulak sa kanilang pakikibaka laban sa imperyalismong US at pagtatanggol sa kanilang pambansang kasarinlan.

Responsibilidad ng mamamayang Pilipino at lahat ng mamamayan ng daigdig na suportahan ang mamamayan ng Libya na labanan ang armadong agresyon ng mga imperyalista at ipagtanggol ang kanilang pambansang kasarinlan.

## Armadong agresyon ng US sa Libya mula dekada 1980

Ang Libya ay isang bansa sa North Africa. Sa hilaga nito ay ang Mediterranean Sea. Nasa silangan nito ang Egypt, sa timog silangan ang Sudan, sa timog ang Chad at Niger at sa kanluran ang Algeria at Tunisia.



Isa ito sa sampung pinakamalalaking bansang nag-aangkat ng langis. Mula sa pagiging saklaw ng Ottoman Empire, ang teritoryong saklaw ng Libya ay sinakop ng kolonyalistang Italy noong 1911. Nang matalo ang Italy sa ikalawang digmaang pandaigdig, nalipat ang Libya sa kontrol ng United Kingdom (saklaw ang prubinsya ng Tripolitania at Cyrenaica) at France (prubinsya ng Fezzan).

Sa pamamagitan ng pakikialam ng mga imperyalista, itinulak ang pagsasanib ng mga prubinsya nito tungo sa isang bansa noong 1950. Idineklara noong 1951 ang pagbubuo ng United Kingdom of Libya sa ilalim ng papet na haring Emir Idris Sanusi. Sa ilalim ng kahariang ito, nabigyan ng karapatan na magtatag ng mga base militar ang UK at ang US.

Noong 1956, binigyan ng hari ang mga dayuhang kumpanya ng mga konsesyon para maghukay ng langis sa Libya. Di nagtagal, naging isa sa pinakamalalaking eksporter ng langis ang Libya. Gayunpaman, lahat ng ito ay nasa kontrol at pinakikinabangan ng mga dayuhan. Lumalim nang lumalim ang hinanakit at galit ng mamamayan ng Libya at nagudyok ito ng patriyotikong kilusan.

Noong 1969, pinangunahan ni Col. Moammar Gadaffi ang isang kudeta ng mga upisyal ng militar at ibinagsak si haring Idris. Sa ilalim ni Gadaffi, itinatag ang isang gubyernong nagdeklara ng "sosyalismo" at "estado ng masa."

Ipinag-utos ang pagsasabansa ng mga bangko at produksyon ng langis at pinalayas lahat ng mga dayuhang tropa sa kanilang bansa. Gamit ang malaking yaman mula sa produksyon ng langis, naitatag ni Gadaffi ang isang populistang rehimen na nagbibigay ng mga katiyakang panlipunan sa mamamayan ng Libya. Gayunpaman, umiral din ang pag-aalburuto dahil sa mga nakikitang pang-aabuso ng kapangyarihan ng ilang mga nasa gubyerno.



Taon XLII Blg. 6 Marso 21, 2011

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

[www.philippinerevolution.net](http://www.philippinerevolution.net)

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: [angbayan@yahoo.com](mailto:angbayan@yahoo.com)

### Nilalaman

<b>Editorial:</b> Kundenahin ang imperyalistang gerang agresyon sa Libya	1
Armadong agresyon sa Libya mula 1980	2
Operation Odyssey Dawn	3
rehimeng Aquino, salot sa migrante	3
Sakuna, humambalos sa Japan	4
Labanan ang rehimeng Aquino at isulong ang digmang bayan	5
<b>Mga taktikal na opensiba</b>	6
7 armas, nakumpiska sa Samar	7
9th IB, salot sa Leyte	8
Pagpupugay kay Leonard Co	9
Dumukot kay Jonas Burgos, tukoy na	10
Lider-maralita, pinaslang	10
Araw ng Kababaihang Anakpawis	11
RH Bill	11
<b>Balita</b>	12

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

Ang bagong opensiba ng panghihimasok ng US ngayong Marso ang pinakahuli lamang sa marami nang pagtatangkang pabagsakin ang gubyernong Gadaffi sa nakaraan. Noong 1982, ipinataw ng US ang embargo laban sa Libya. Noong 1984, pinakana ng US ang tangkang asasinasyon kay Gadaffi. Noong 1986, binomba ng US ang mga syudad ng Tripoli at Benghazi.

Noong 1992, ginipit ng UN ang ekonomya ng Libya kapalit ng pagpapasuko ng mga Libyan na sangkot sa pagpapabagsak sa isang komersyal na eroplano noong 1987 sa Scotland.

Tinupad ito ni Gadaffi noong 1999 at sinundan pa ng pagtali- ma sa iba pang mga kundisyon ng UN, kabilang ang pagwasak sa ilang mga kagamitang pandigma. Tuluyang inalis ng UN ang mga paghihigpit hanggang 2004. Sa mga sumunod na taon ay patuloy na nagluwag ang ibang bansa sa pakikipagkalan sa Libya. AB

## Operation Odyssey Dawn

Sanimulang bombahin ng mga eroplanong pandigma ng France ang Benghazi, pangalawang pinakamalaking syudad sa Libya noong madaling araw ng Marso 20. Sinundan ito ng serye ng pambobomba ng mga barko de gera at submarino ng United Kingdom (UK) at US sa baybayin ng Libya. Umabot sa 110 Tomahawk na misayl ang pinakawalan ng US at UK. Tinawag nilang Operation Odyssey Dawn ang pambobomba na nakatutok sa pagpilay sa depensang panghimpapawid ng bansa.

Ayon sa mga ulat mula sa Libya, maraming tangke, eroplano at iba pang kagamitang militar ang nawasak sa pambobomba. Kasabay nito, 48 sibil- yan ang namatay at 150 ang nasugatan.

Ilang libong mamamayan ang agad na nagtungo sa Bab al-Azizia, isa sa mga *compound* ni Gaddhafi na binomba ng US noong 1986 at sa pandaigdi- gang paliparan sa Tripoli para protektahan ang mga ito.

Ang Operation Odyssey Dawn ang pinakamalaki nang imperyalistang gerang agresyon sa Middle East matapos ang dig- mang agresyon ng US sa Iraq noong 2003. Hindi ito kaiba sa

mga digmang agresyon ng da- ting rehimeng Bush.

Bilang tugon, nagbabala si Gadaffi ng paglulunsad ng “ma- habang digma” kung saan ga- gapiin ng mamamayang Libyan ang mga mananakop. Nanawag- an siyang mag-armas ang lahat ng mamamayang Libyan bilang paghahanda sa pagsalakay ng mga tropa ng US, UK at France sa kanilang bansa.

Isinagawa ang pambobom- ba matapos magpasya ang UN Security Council na ipatupad ang “no-fly zone” o pagbaba- wal na lumipad sa himpapawid ng Libya. Hindi sinang-ayunan ng Russia at China ang paghi- higpit sa Libya. AB

## Rehimeng Aquino, salot sa migranteng manggagawa

Mariing binatikos ng Migrante-Middle East ang pinakahuling desisyon ng rehimeng Aquino na ipaubaya sa mga migran- teng apektado ng krisis sa pulitika at sakuna sa iba't ibang dako ng daigdig ang gastos ng kanilang byahe pauwi sa Pilipinas. Tinawag na “boluntaryong repatriation” ang hakbang na ito. Anang Migrante, nagpapakita ito ng kawalang-interes ng rehimen na tiya- kin ang kaligtasan ng mga manggagawang Pilipino, laluna sa mga panahon ng digmaan, matinding kaguluhang pampulitika at ka- lamidad.

Dismayadong-dismayado ang mga migrante sa ganitong hak- bang ng rehimen. Duda silang ibubulsa lamang ng mga upisyal ng gubyerno ang \$150,000 pon- dong inilaan ng Department of Foreign Affairs at P200 milyon mula sa Overseas Workers Welfa- re Administration para sa ebak- wasyon ng mga migrante sa Libya pa lamang.

Sa loob ng ilang linggong

tuluy-tuloy na pag-aaklas ng mamamayan sa iba't ibang ba- hagi ng Middle East at North Africa, walang ginawa ang rehimeng Aquino para pag- handaan ang pag-atras ng mga Pilipinong maaapek- tuhan doon.

Sa Libya, kung saan nagsimula na ang digmang agresyon ng US, umaabot pa lamang sa 8,200 sa ti-

natayang 26,000 manggaga- wang Pilipino roon ang naiuwi sa bansa. Karamihan sa mga na- kauwi ay ginastusan ng kani- lang mga amo o di kaya'y umangkas sa mga libreng sakay ng ibang mga gubyerno. Ang hi- git na nakararami ay napipilitan manatili sa loob ng bansa o sa mga karatig-bansa sa kabila ng napakamapanganib na nilang sitwasyon.

Kanya-kanya ang kilos ng mga migrante at wala silang ko- ordinasyon sa embahada or anu-



mang sangay ng gubyrno para makatawid man lamang sila sa mas ligtas na mga karatig-bansa. Isang Pilipino na ang naiulat na napatay nang salakayin ng mga bandidong Libyan ang pinagta-trabahuan nitong *oil rig*.

Sa Bahrain, pinayuhan lamang ng rehimeng Aquino ang mga Pilipino na “maging mahinahon” sa gitna ng matitinding kilos-protesta roon. Umaabot sa 32,000 Pilipino ang naiipit sa papalalang sitwasyong pampulitika roon. Walang inihapag na planong pangkagipitan ang embahada roon, at wala rin silang balak na ilikas ang mga manggagawang Pilipino.

Ganito rin ang sitwasyon sa Yemen. Nakapailalim ngayon sa *emergency rule* ang bansa matapos salakayin ng mga tropa ng gubyrno ang mga kilos-protesta noong ikalawang linggo ng Marso. Sa kabila nito, walang anumang aksyong ginawa ang gubyrno ni Aquino, kahit ang paglalataw man lamang ng planong pangkagipitan at pagtitiyak sa linya ng komunikasyon sa mga Pilipinong naiipit doon. Walang embahada ang Pilipinas sa Yemen.

Sa pinakahuling estadistika ng Philippine Overseas Employment Administration, umaabot sa 2.26 milyon ang mga Pilipinong nagtatrabaho ngayon sa Middle East. Noong 2010, tinatayang nagremit sila ng \$1.47 bilyon.

Pag-uwi nila sa Pilipinas, lalong walang plano ang rehimeng Aquino para saluhin at buhayin sila at ang kanilang mga pamilya. Sa halip, ipinangangalandakan pa ng DFA na “temporaryo” lamang ang mga sigalot sa Middle East at sa gayo’y libreng libre silang bumalik doon matapos ang mga gulo at gera.

Sa Japan, mariing kinundena ng mga nasalantang Pilipino roon ang kawalang plano at kainutilan ng mga upisyal ng rehimeng Aquino. Isang linggo matapos ang lindol, 112 pa lamang sa

## Dambuhalang mga sakuna, humambalos sa Japan

**T**aimtim na nakikiramay ang Partido Komunista ng Pilipinas at ang buong rebolusyonaryong kilusan sa mamamayan ng Japan na dumanas ng sunud-sunod na malalaking sakuna nitong nagdaang mga araw.

Bandang alas-3 ng hapon noong Marso 11, niyanig ng isang napakalakas na lindol ang baybayin ng hilagang-silangang Japan. Ang lindol na ito na may lakas na 9 sa Richter scale (sukat na ng lakas ng lindol), isa sa pinakamalalakas na pagyanig na natala sa kasaysayan.

Sinundan ang lindol ng isang dambuhalang tsunami na humambalos sa Sendai. Nilunod at winasak ng halos 40 talampakang mga alon ang buu-buong mga komunidad malapit sa dagat. Tinatayang umaabot 20,000 ang bilang ng mga namatay. Sa Minamisanku pa lamang, isa sa mga bayan ng Sendai na nilunod ng tsunami, tinatayang 10,000 na sa 17,000



residente nito ang namatay.

Kabilang sa napinsala ng malakas na lindol at tsunami ang plantang nukleyar ng Fukushima-Daiichi. Nasira ang sistema nito ng pagpapalamig na humantong sa pagsabog ng ilang reaktor na nagresulta sa pagkalat ng mga partikulong *radioactive* sa himpapawid at kapaligiran. Ang mga partikulong ito ay kahalintulad ng materyales na ikinalat ng pagsabog ng bomba atomika na ikinamatay ng daan-daan libo at nagdulot ng malalalang sakit tulad ng kanser.

Ipinag-utos na ang ebakwasyon ng buong populasyon na nakatira malapit sa paligid ng plantang nukleyar. Ang pangambang kumalat ang mga partikulong ito at ang kontaminasyon ng tubig at pagkain ay nagdulot ng matinding takot sa mamamayan.

Tinatayang umaabot sa \$38 bilyon ang halaga ng mga nawasak na ari-arian sa magkasunod na lindol, tsunami at pagsabog ng plantang nukleyar. **AB**

tinatayang 4,000 Pilipino ang nailipat ng embahada roon sa mas ligtas na mga lugar. Kung hindi nag-ingay ang mga Pilipino roon, halos walang tulong na ibibigay sa kanila. Ang tanging ginawa ng mga upisyal ay “subaybayan ang sitwasyon.”

Isang halimbawa rito ang isang grupo ng mga estudyanteng nakabase sa Sendai, lugar na nakaranas ng pinakamatin-

ding salanta bunga ng lindol at tsunami. Ayon sa salaysay ng naturang mga estudyante, agad silang humingi ng saklolo sa embahada ng Pilipinas pagkatapos ng tsunami. Dumating ang mga upisyal ng embahada, pero wala silang anumang plano, kahit man lamang ang paglilipat sa kanila sa ibang lugar. Sa halip, ipinasa lamang sila sa mga kagawad ng midya. **AB**

# Labanan ang rehimeng US-Aquino at isulong ang digmang bayan

**A**ng nalalapit na pagdiriwang ng ika-42 anibersaryo ng pagkakatatag ng Bagong Hukbong Bayan (BHB) sa Marso 29 ay okasyon para ipagdiwang ng mamamayang Pilipino at ng mga rebolusyonaryong pwersa ang mga tagumpay ng BHB sa armadong pakikibaka nitong nagdaang taon. Pagkakataon din ito upang pagtibayin ang determinasyon ng mga Pulang mandirigma, rebolusyonaryong pwersa at mamamayan na biguin ang imbing pakana ng armadong kontra-rebolusyon na gapiin ang armadong rebolusyon at mga pakikibakang masa.

Nagkakamali ang rehimeng US-Aquino sa pag-aakala nitong tuluy-tuloy lamang itong makapaghahari sa pamamagitan ng pagpapatupad ng mga patakaran at programang dikta ng imperyalismong US at mga hungkag na gimik habang hindi nito nilulutas ang saligang mga suliraning pang-ekonomya, panlipunan at pampulitika.

Ang ipinatutupad nitong mga programa ay mahigpit na umaayon sa patakaran ng neoliberal na globalisasyon ng imperyalismong US. Dinadala nito sa bagong antas ang programa ng denasyunalisasyon, deregulasyon, pribatisasyon at liberalisasyon ng kalakalan at pamumuhunan at nagdudulot ng ibayong pinsala sa ekonomya at kabuhayan ng mamamayan. Wala itong maipagmalaki kundi ang pagbibigay-limos sa ilalim ng tinaguriang Programang Pantawid Pamilyang Pilipino sa tangkang tabunan ang sigaw ng mamamayan para sa lupa, trabaho, dis-

senteng sahod at mga serbisyon ng panlipunan.

Mahigpit na sinusunod ni

Aquino ang teroristang gera ng

US at ang US Counterinsurgency Guide sa binuo nitong Oplan Bayanihan (OPB). Itinutuloy lamang ng OPB ang brutal na kampanyang panunupil sa ilalim ng Oplan Bantay Laya. Upang pagtakpan ang patuloy na mga paglabag sa mga karapatang-tao at mga pasistang krimen, ipinag-utos ni Aquino sa Armed Forces of the Philippines (AFP) ang paggamit ng mga demagohikong islogan tulad ng “pagkakamit ng kapaypaan” at “paggalang sa karapatang-tao.”

Nagbubulag-bulagan ang rehimeng US-Aquino sa lumalaganap na galit ng mamamayang Pilipino sa kabiguan nitong ipatupad ang pangako nitong panagutin ang rehimeng Arroyo sa malalalang kaso ng korapsyon, mga pasistang krimen at paglabag sa karapatang-tao. Ang pagsirit ng presyo ng mga bilihin at mga singilin, ang matarik na pagbagsak ng kabuhayan, at ang paglala ng kahirapan at kagutuman ay gumagatong sa nagbabagang galit ng mamamayan at paghahangad nilang makamit ang saligang pagbabago sa kanilang kalagayan.

Lumulubha ang dinaranas na krisis ng naghaharing sistemang pampulitika. Sa tuwi-tuwina ay niyayanig nito ang paghahari ng rehimeng Aquino. Kabi-kabila ang pagputok ng mga banggaan at tunggalian ng mga nagriribalang paksyon ng naghaharing

uri. Sa kabilang panig, ang naiipong galit ng mamamayan ay sumisiklab-siklab sa kaliwa't kanang mga kilos-protesta. Di maglalaon ay hahantong ang mga ito sa mas malalaki pang pagkilos ng masa sa harap ng ipinakikita ni Aquino na kawalang malasakit sa interes at kapakanan nila.

Mabilis na nalalantad ang korapsyon at kalupitan ng rehimeng Aquino at ang anti-mamamayan, antinasyunal at anti-demokratikong katangian nito. Ang matinding krisis ay nagtutulak sa mamamayan na lumaban.

Patuloy na lumalakas at lumalawak ang rebolusyonaryong kilusang masa. Sa harap ng sitwasyong ito, maaaring buuin ng mga rebolusyonaryong pwersa ang isang malapad na nagkakaisang prente at iluwal ang isang malakas na kilusang masa na kayang maghiwalay at magpabagsak sa rehimeng Aquino sa relatibong maigsing panahon.

Ang patuloy na paglubha ng krisis ng naghaharing sistema ay lumilikha ng paborableng kundisyon para sa pagsusulong ng armadong rebolusyon at mga pakikibakang masa. Nasa katayuan ang Bagong Hukbong Bayan (BHB) na magkamit ng malalaking pagsulong. Bawat isang yunit ng BHB ay dapat magkaroon ng tiyak na panahon para sa gawaing pangkombat at mga pagsasanay pulitiko-militar. Magagawa ito kaalinsabay ng pagpapalakas ng mga lokal na sangay ng Partido at mga organisasyong masa sa kanayunan at pagsusulong ng rebolusyong agraryo sa papalawak na saklaw.

Ang panahon ng paghahari ng rehimeng Aquino ay panahon ng malaking pagsulong ng digmang bayan. Alinsunod sa panawagan ng PKP, nakatuon ang BHB at lahat ng rebolusyonaryong pwersa sa pagtupad ng mga rekisito para isulong ang digmang bayan sa yugto ng estratehikong pagkapatas. **AB**





# Mga taktikal na opensiba laban sa Oplan Bayanihan

**D**i bababa sa 11 elemento ng AFP ang napatay at 19 ang nasugatan sa mga aksyong militar ng Bagong Hukbong Bayan (BHB) sa iba't ibang rehiyon mula Pebrero hanggang Marso. Matingkad sa mga aksyong militar na ito ang pagparusa sa mga pusakal na tropang nagsisilbing protektor ng mapaminsalang mga kumpanya sa pagmimina at agribisnes.

**Sa Southern Mindanao.** Binigwasan ng Armando Duman-dan Command ng BHB sa Compostela Valley ang mga tropa ng 10th ID sa dalawang aksyong militar nitong Marso 11 at 13. Di bababa sa limang sundalo ang napatay, kabilang ang isang *company commander*, at 12 ang nasugatan. Ang mga sundalong naglulunsad ng operasyong kombatan ay gumamit ng karatulang Peace and Development Operations sa ilalim ng Oplan Bayanihan.

Malaking kaswalti ang naidulot ng BHB noong ala-una ng hapon ng Marso 11 nang pasabugan ng *command-detonated land mine* ang isang 40-kataong kolum ng kaaway sa Sityo Tan-awan, Barangay Malina-won, Mawab, Compostela Valley. Ang lugar ay saklaw ng perimetro ng bagong-lipat na himpilan ng 10th ID. Kabilang sa mga napatay si 1Lt. Godofredo Despojo Jr.

Taliwas sa mga pahayag ng AFP, walang kaswalti sa hanay ng BHB.

Dahil nangyari ang aksyong militar ng BHB nang napakalapit lamang sa hedkwarters ng 10th ID, sinabi ni Lt. Col. Lyndon Paniza, kumander at tagapagsalita ng 72nd IB na iisa lamang daw ang kaniyang kaswalti. Subalit dalawang siksabay ang ipinadala ng kaaway sa Sityo Mahayahay, Barangay Tuburan sa bayan din ng Mawab para kunin ang mga bangkay at sugatan.

Dalawang araw matapos ito, isang sarhento ang napatay nang isnaypin ng BHB ang mga tropa ng 3rd Special Forces sa sentro ng Baragay Latiban, New Corella, Davao del Norte.

Samantala, noong Pebrero 25 ay pinarusahan ng mga partisano ng Magtanggol Roque Command ng BHB ang isang *combat intelligence asset* ng 39th IB. Si Roldan Quitua, 24, na pinarusahan sa Sta. Cruz, Davao del Sur ay hinahawakan ng isang Lieutenant Villegas ng 39th IB.

Pinapasok siya sa BHB noong huling bahagi ng 2008 ng kanyang *handler* para maniktik. Nang mapag-alaman ang tunay niyang pagkatao ay agad siyang tumiwalag. Isinumbong niya sa militar ang kinalalagyan at lakas ng BHB, at nagresulta ito sa dalawang depensibong labanan, na napangibabawan ng Pulang hukbo dahil sa napapanahong pagpapaabot ng importasyon ng masya.



Tuwing may operasyon ang 39th IB ay aktibo si Quitua sa pananakot at panghaharas sa mga tagabaryo, laluna yaong tumututol sa Barangay Defense System.

**Sa Far South Mindanao.** Di bababa sa anim na kaswalti ang idinulot ng milisyang bayan at mga Pulang mandirigma ng Mt. Alip Operations Command sa mga tropa ng AFP sa Davao del Sur at Columbio, Sultan Kudarat.

Noong Marso 2, di bababa sa apat na sundalo ang tinamaan nang isnaypin ng BHB ang mga nag-ooperasyong tropa ng 27th IB sa Barangay Tagaytay, Mag-saysay, Davao del Sur. Matapos ang isang linggo, dalawa pang kaswalti ang idinulot ng BHB nang isnaypin nila ang mga nananalasang tropa ng 39th IB sa Barangay Colonsabak, Matanao, Davao del Sur.

Ang mga tinarget na tropa ang gumugwardya sa mapaminsalang dambuhalang minahang Xstrata-SMI.

**Sa Northcentral Mindanao.** Winasak ng Rexan Perez Command ng BHB ang *heavy equipment* ng Dole Philippines at Sumifru sa Malaybalay, Bukidnon noong Pebrero 26 at 28. Ang aksyong pamarusa ay isinagawa dahil sa pang-aagaw ng mga kumpanyang ito sa lupa ng mga magsasaka, pagsasamantala nila sa mga manggagawa at pangwawasak sa kalikasan.

Noon namang Pebrero 23, isang elemento ng CAFGU ang napatay at isa pa ang nasugatan sa operasyong harasment na inilunsad ng Ernesto "Boyboy" Roa Command ng BHB, mga alas-7 ng gabi sa Barangay Dao, San Fernando, Bukidnon laban sa mga nag-oo-



perasyong tropa ng 8th IB. Ang 8th IB ang protektor ng Eagle Mining Co., na labis na kinamumuhian ng mga Lumad sa lugar dahil sa pagwasak nito sa mga bundok, sapa at pinagkukunan ng tubig.

Samantala, mariing pinabulaanan ng BHB sa Negros na nasangkot ang mga mandirigma nito sa isang *mis-encounter* noong Enero 28 sa Cambayobo, Calatrava, Negros Occidental. Ang totoo, ani Ka Cecille Estrella, tagapagsalita ng RPC, mga tropa ng AFP ang nasangkot sa naturang *misencounter*, na ikini-namatay ng di bababa sa 15 sundalo.

Bago ang *misencounter*, inambus ng mga Pulang mandirigma ang isang grupo ng mga sumasalakay na sundalo. Limang sundalo ang napatay sa unang bwelo ng putukan. Isang Pulang mandirigma naman ang namartir sa labanang ito.

Mabilis na nakaatras ang BHB mula sa lugar na pinaglabanan at hindi na sila inabutan ng mga ipinadalang reimporsment ng kaaway. Dahil sa kanilang matinding takot na matambangan ng BHB, mga elemento mismo ng AFP, Division Reconnaissance Coy at PNP ang nagkaputukan. **AB**

## 7 armas, nakumpiska ng BHB sa ambus sa Eastern Samar

Inambus ng mga Pulang mandirigma ng Bagong Hukbong Bayan-Eastern Samar (Sergio Lobina Command) ang nagpapatrulyang mga elemento ng 3rd Maneuver Platoon-Regional Mobile Group-PNP na lulan ng mga motorsiklo sa Brgy. Tangbo, Arteche noong ika-26 ng Pebrero, bandang alas-onse ng umaga.

Agad na namatay si Police Inspector Al Llanza Tantiado at malubhang nasugatan ang tatlo pa matapos pasabugan at paulanan sila ng mga bala ng mga Pulang mandirigma. Nakaligtas sa ambus si PO1 Portajada at agad niyang isinurender ang kanyang armas. Ligtas siyang pinauwi. Nakumpiska sa labanan ang tatlong rip-leng M16, isang ripleng M14, dalawang kalibre .45 at isang .9mm na pistola, mga bala at iba pang gamit-militar.

Ang nagpapatrulyang mga elemento ng PNP ay pauwi sa kanilang hedkwarters sa bayan ng Arteche mula sa baryo ng Catumsan. Ang PNP-RMG ay aktibong katuwang ng AFP sa paglulunsad ng *combat* at *clearing operations* sa malaking bahagi ng Northern at Eastern Samar sa ilalim ng Oplan Bayanihan ng kasalukuyang rehimen.

Pinatutunayan sa mga nakumpiskang datos mula sa mga elemento ng PNP-RMG ang akti-

bo nilang papel sa pagtatayo ng mga *monitoring-intelligence units/assets, checkpoints, quick reaction force* at iba pang katu-lad na tipo bilang mahigpit na katuwang ng AFP sa *counter-insurgency operations*.

Tugon ang naturang ambus sa panawagan ng rehiyon na pagiging at pataasin ang antas ng pakikidigmang gerilya at biguin ang Oplan Bayanihan ng kasalukuyang rehimen. Tugon din ito sa matagal nang hinihinging hustisya ng mamamayan ng Eastern Samar sa maraming kaso ng paglabag sa karapatang tao ng AFP at PNP-RMG.

Higit sa lahat, pinatunayan ng matagumpay na taktikal na opensiba na sa gitna ng masinsing operasyon ng kaaway sa mga hangganan ng Northern at Eastern Samar, naging matagumpay ang ambus dahil sa mainit na suporta at pagtangkilik ng mamamayan ng Eastern Samar sa Bagong Hukbong Bayan. **AB**

## EDC, binalaan ng BHB-Nueva Ecija


Binigyang-babala ng Provincial Operational Command ng Bagong Hukbong Bayan (BHB) sa Nueva Ecija ang Energy Development Corporation (EDC) laban sa plantasyon nito sa lalawigan. Sa isang liham kay Paul Aquino, *chief executive officer* ng EDC at tiyo ni Benigno Aquino III, sinabi ng BHB sa Nueva Ecija na itigil na ng EDC ang proyekto nito sa Sityo Maluyon, Barangay Villarica sa bayan ng Pantabangan.

Anang BHB, ang plantasyon ng EDC na sumasaklaw sa buong komunidad ng mga pambansang minorya at setler ay "lantarang anyo ng pagyurak sa karapatan ng mga magsasaka sa

lupa at pagkakait sa kanila ng pantay na pakinabang sa likas-yaman."

Kasabwat ang reaksiyunaryong gubyerno sa pamamagitan ng National Irrigation Adminis-

tration (NIA), nauna nang pina-giba ng EDC ang mga bahay ng mamamayan sa lugar at





ipinagbawal pati ang mga kubong sinisilungan nila. Pwersahan silang inipon sa isang maliit na *relocation site* na napakalayo sa kanilang mga lupaing binubungkal na wala ring anumang ligal na garantiya na hindi uli sila mapapalayas sa lugar. Pinagbabantaan sila at tinatakot na sasampahan ng kung anu-anong kaso dahil sa kanilang pagtutol. Garapalan ding idineklara ng EDC na pati ang mga bukid at iba pang napaunlad nang pusisyon ng mga magsasaka ay sasaklawin na rin ng pagpapatanim ng kumpanya. Instrumento ng EDC at NIA sa panggigipit ang 81st IB.

Ngayon ay plano na namang angkinin ng EDC ang panibagong 100 ektarya ng lupain mula sa naunang 50 ektaryang natamnan na ng mga punongkahoy para sa komersyal at pribadong pakinabang.

Katuwang ang militar, malaon nang ginigipit ng NIA ang mga residente sa lugar. Noong 2006 ay pinaslang ng mga berdugong tropa bg 48th IB si Rev. Pastor Andy Pawican, ang tumatayong lider ng mga magsasaka laban sa panggigipit at pagpapalayas ng NIA.

Idinagdag ng BHB na bukod sa pagkakait sa mamamayan ng karapatan sa lupa ay higit pang inaabuso ng EDC at pinagsasamantalahan ang mga manggagawa na tinipon nito sa ilalim ng Maluyon Indigenous Christian Farmers Association (MICFA). Napakalayo sa takdang minimum na arawang sahod ang ibinibigay ng EDC sa mga manggagawa at kung minsang inoobliga pa silang magtrabaho nang walang bayad.

Sa bisa ng awtoridad ng Demokratikong Gubyernong Bayan ay inatasan ng BHB ang EDC na ibigay sa mga manggagawa ang karampatan nilang sahod. Kukwentahin ito mula sa unang araw na nagsimula itong magpatrabaho sa lugar.

Pinayuhan ng BHB ang EDC na magpaabot ng apela sa pamamagitan ng usapang pangkapayapaan kung nakahanda itong tumalima sa mga tuntunin at regulasyon ng Demokratikong Gubyernong Bayan. Kabilang sa kanilang mga obligasyon ang pagtitiyak pangunahin sa kapakanan ng mamamayan, pangangalaga sa kapaligiran at pambansang patrimonya, kumpensasyon sa mga abala at pinsala, gayundin ang demokratikong konsultasyon at pahintulot ng mga komunidad na kagyat at direktang maaapektuhan ng operasyon ng EDC.

AB

## 19th IB: Berdugo ng Leyte

Ibinunyag ng Mt. Amandewin Command ang buong konteksto ng pagpaslang ng 19th IB kina Leonardo Co, isang bantog na Pilipinong *botanist*, at iba pa niyang kasamahan habang nananaliksik sa kagubatan ng Kananga, Leyte noong Nobyembre 15, 2010. Sa humigit-kumulang 15 minutong pagpapaulan sa kanila ng bala ng 19th IB, napaslang sina Co, isang *forest guard* at isang magsasakang tumutulong sa kanyang pananaliksik.

Para makapaghugas-kamay sa kanilang krimen, sinabi ng 19th IB na sina Co at dalawa pang biktima ng karahasang militar ay napatay sa pakikipagpalitan ng putok ng mga sundalo sa Bagong Hukbong Bayan (BHB) at ang mga balang tumama sa kanila ay nagmula raw sa BHB.

Pinabulaanan ito ng dalawang nakaligtas sa "Kananga Masaker". Anila, wala silang nakitang ibang tao sa lugar maliban sa militar. Ang kanilang mga kasangkapan para sa pananaliksik ay napagkamalang mahahabang armas o awtomatikong riple na naging dahilan para paulaan sila ng bala ng mga sundalong utak pulbura.

Kinatigan ng isang *task force* ng Department of Justice ang pagsisinungaling ng militar. Ngunit hindi ito tinanggap ng pamilya, kaibigan at mga kakilala ng syentista. Nagsampa ang pamilyang Co ng kasong *murder* laban sa platoon ng militar na sangkot sa masaker, kabilang ang kanilang kumander at pangalawang kumander. Sa kasong kriminal na isinampa ng balo ni Leonardo Co na si Glenda at mga magulang na sina Lian Sing Co at Emelina Co, tinukoy

nila ang ilan sa 38 upisyal at tauhang sangkot sa Kananga Masaker na sina 1Lt. Ronald Odchimar, 2Lt. Cameron Perez, Cpl. Roger Mores, Pfc. Albert Belmonte, Pfc. Gil Guimerey, Pfc. Alex Apostol, Pfc. William Bulic at 28 iba pa.

Nitong Pebrero, nagpalabas ng pahayag ang Mt. Amandewin Command (BHB-Leyte) tungkol sa masaker. Anito, katingkati na ang mga daliri ng mga elemento ng 19th IB na pumisil ng gatilyo dahil isa't kalahating buwan bago ang masaker ay inambus sila ng Mt. Amandewin Command habang nag-ooperasyon sa Barangay Salvacion sa kalapit na bayan ng Albuera. Pitong sundalo ang napatay at dalawa ang nasugatan sa mga sagupaang ito. Kaya naman nang makita ng 19th IB ang grupo nina Co sa kagubatan ng Kananga ay agad nila itong pinaputukan nang walang pagtiyak kung sino ang kanilang tinarget.

Sa kabila ng mariing mga pagbatikos sa masaker sa Kananga, hindi naglubay ang 19th IB sa pananalasa sa mga sibilyan sa mga bayan ng Kananga, Carigara, Capoocan, Ormoc, Albuera, Baybay, Bu-



rauen at Jaro, lahat sa Leyte. Sinaklaw ng kanilang mga operasyon kahit ang tigil-putukan noong Disyembre. Noong Disyembre 14, inambus sila ng BHB sa pagitan ng Barangay Tigbaw at Barangay Candigahob sa Carigara, kung saan sampung sundalo ang napatay at lima ang nasugatan. Tulad ng nangyari sa naunang ambus, itinago ng 19th IB sa midya ang laki ng kanilang mga kaswalti.

Hinikayat ng Mt. Amandewin Command ang iba't ibang sektor na suportahan ang pakikibaka para sa katarungan ng mga biktima ng masaker sa Kananga at sa iba pang biktima ng paglabag ng 19th IB sa karapatang-tao. Anito, dapat matapos na ang panahon ng walang patumanggang paglabag ng 19th IB sa karapatang-tao. Dapat imbestigahan ang lahat ng paglabag nito sa International Humanitarian Law, at dapat buwagin ang batalyon dahil sa lansakang paglabag nito sa mga alituntunin ng digma. **AB**

## "Sierra Madre Trek"

### Isang pagpupugay kay Leonard Co

**L**alakbayin ng mga kamag-anak, ka-libigan at mga tagapagtanggol ng kalikasan ang kabundukan ng Sierra Madre bilang pagpupugay sa makabayang syentistang si Leonardo Co. Ang paglalakbay ay inorganisa ni Darwin Flores, bayaw ng yumaong syentista.

Magkakaroon ng dalawang bahagi ang "Sierra Madre Trek: 1) Reconnaissance trek mula Marso 23 hanggang Abril 11--na lalahukan ng mga kasapi ng University of the Philippines-Baguio Mountaineers; 2) Paglalakbay ng isang 30-kataong grupo mula Abril 18-23. Inaasahang maraming mga *mountaineer* at mga maka-kalikasan ang lalahok dito. Magtatapos ang "Sierra Madre Trek" sa pagkalat sa mga abo ni Co sa 16-ektaryang Forest Dynamics Ploy sa Barangay Villarobles, sa Palanan, Isabela kung saan matagal siyang naglagi dahil sa kanyang pananaliksik hinggil sa mga halamang gamot. **AB**

## Lider-maralita, pinaslang

**I**sang lider maralita ang pinatay sa lunsod ng Navotas ng ipinaniniwalaang mga armadong ahente ng estado. Si Antonio "Nono" Homo, 47, ay *campaign officer* ng Nagkakaisang Samahan sa Kadiwa, isang lokal na tsapter ng Kalipunan ng Damayang Mahihirap (KADAMAY) sa Navotas. Residente siya ng San Roque Village sa Kadiwa, Navotas City.

Dakong alas-8:40 ng gabi noong Marso 16 nang malapitang barilin sa ulo si Homo, gamit ang isang .45 pistola.

Mariing kinundena ng KADAMAY ang pagpaslang kay Homo. Ayon sa KADAMAY, isa si Homo sa mga namumuno sa mga pagkilos laban sa demolisyon sa lugar. Katunayan, kabilang siya sa mga nagsampa ng kaso laban sa meyor ng Navotas na si John Ray Tiangco at City Engineering Office ng lunsod kaugnay sa iligal na demolisyon na nagsimula pa noong Marso 3.

Nanawagan ang KADAMAY na patuloy na depensahan ng mga maralita ang kanilang trabaho, kabuhayan at mga tirahan. **AB**

## Upisyal-militar, sangkot sa pagdukot kay Jonas Burgos

**P**inananagot ng Commission on Human Rights (CHR) ang isang upisyal ng AFP sa pagdukot sa aktibistang si Jonas Burgos. Si Burgos ay dinukot sa isang kainan sa Ever Gotesco Mall sa Commonwealth Avenue, Quezon City noong Abril 2007. Sa ginawa noong imbestigasyon, napag-alaman na ang plaka ng isa sa mga ginamit na sasakyan sa pagdukot kay Burgos ay nagmula sa isang kumpiskadong sasakyang nasa pangangalaga ng 56th IB.

Ayon kay Deputy Jose Manuel Mamaug ng CHR, kinilala ng isang testigo si 1Lt. Harry Baliaga Jr. bilang isa sa mga armadong taong dumukot kay Burgos. Si Baliaga ay nakatalaga noong panahong iyon sa 56th IB. Ang yunit-militar na ito ay nakapailalim sa 7th Infantry Division na pinamumunuan noon ng berdugong si Gen. Jovito Palparan.

Malaking tulong sa imbestigasyon ng CHR ang testimonya ni Jeffrey Cabintoy na nagtatrabaho noon sa restawran kung saan dinampot si Burgos at ni Edmond Daguman, isang dating sundalo na nagsilbi sa ilalim ni Baliaga sa 56th IB. Inirekomenda ng CHR sa Korte Suprema na gawaran ng *writ of amparo* si Gng. Edita Burgos, ina ng biktima at iutos kay Baliaga na ilitaw si Burgos. Bahagi rin ng rekomendasyon ang pagsasampa ng kasong *kidnapping/enforced disappearance/arbitrary detention* kay Baliaga bilang isa sa mga pangunahing akusado dahil sa kanyang direktang partisipasyon sa pagdukot kay Burgos. **AB**



Sa ika-100 Internasyunal na Araw  
ng Kababaihang Anakpawis

# Kainutilan ng rehimeng US-Aquino, binatikos

**L**ibu-libong kababaihang Pilipino ang nakiisa sa pagdiriwang ng ika-100 Pandaigdigang Araw ng Kababaihang Anakpawis noong Marso 8. Bilang paggunita sa araw na ito, nagmartsa ang kababaihan sa harap ng Malacañang at iba't ibang sentrong bayan para igiit ang kanilang karapatan para sa serbisyong pangkalusugan at laban sa nagtataasang presyo ng mga serbisyo at bilihin.

Sa pangunguna ng GABRIELA at mga progresibong organisasyon, inihambing nila ang unang siyam na buwan ng bagong luklok na rehimeng Aquino sa pagbubuntis ng kainutilan. Sa kanilang pahayag, iniluluwal nila sa araw na iyon ang kanilang disgusto laban sa makadayuhan at kontra-mamamayang bagong rehimen.

Kabilang sa mga binatikos ng GABRIELA ang mga programa ng rehimeng Aquino katulad

ng Public-Private Partnership (PPP) na walang iba kundi pag-sunod sa iskema ng pribatisasyon at denasyunalisasyon ng imperyalismong US. Binatikos din nila ang *conditional cash transfer* (CCT) na walang tunay na makikinabang maliban sa mga upisyal ng gubyrerno na kumukurakot sa pondo nito. Nawagan din silang isabatas ang Comprehensive Reproductive Health Bill na ipinanukala ng Gabriela Women's Party

sa Kongreso. Nakiisa ang mga raliyista sa kababaihan sa buong mundo, laluna sa mga bansang binabayo ng matitinding krisis sa pulitika. Ginunita ang araw na ito habang milyun-milyong kababaihan ang kumikilos, kasama ng kani-kanilang mga mamamayan, sa mga protesta at pag-aalsa na ibinunsod ng masasama at mapangwasak na epekto ng pandaigdigang resesyon. Sadyang angkop ang paggunita sa araw na ito lalupa't ang pandaigdigang araw ng kababaihan ay pagpupugay sa mga kilos-protesta ng kababaihan laban sa masasamang epekto ng kapitalismo.

Nagkaroon din ng mga katulad na pagkilos sa Southern Tagalog, Central Luzon, Bicol, Cordillera, Negros, Iloilo, Cebu, Bohol, Southern Mindanao, Caraga, Northern Mindanao at Socksar-gen. AB

## RH Bill: Para sa kalusugan ng kababaihan

**B**oto para sa kalusugan ng kababaihan, hindi sa pagkontrol ng populasyon. Ito ang tugon ng Gabriela Women's Party (GWP) sa kritisismo at maitim na propaganda ng simbahang Katoliko at iba pang konserbatibong sektor sa inihain nitong Comprehensive Reproductive Health (RH) Bill sa Kongreso.



Ayon sa GWP, hindi lamang nakapokus ang panukala sa pagbibigay sa kababaihan ng karapatang pumili ng pamamaraan para maiwasan ang di planadong pagbubuntis, kundi sa karapatan nila sa mga serbisyong pangkalusugan sa pangkalahatan. Hindi ipinagkakaila ng GWP na bahagi ng panukala ang *birth control*, pero ito ay isa lamang sa mahabang listahan ng mga hakbang na dapat tiyakin ng estado para pangalagaan ang kalusugan ng kababaihan.

Dagdag ng GWP, isang babae ang namamatay ka-

da dalawang oras dala ng mga kumplikasyon sa panganganak. Dagdag pa rito ang umaabot sa 11 babaeng namamatay sa iba't ibang dahilan. Ang kalunus-lunos na kalagayan ng kababaihan, laluna ng kababaihang anakpawis, ang pangunahing dahilan para itulak ng GWP ang RH Bill.

Ang sumusunod ay ilan lamang sa masasaklaw na probisyon ng panukalang RH Bill:

> pagtiyak na mayroong sapat na bilang ng mga sinanay na komadrona sa mga komunidad

> sapat na pasilidad sa mga pampublikong ospital sa bawat syudad at prubinsya para sa anumang pangangailangan ng mga nanganganak (*obstetric care*) at kanilang mga sanggol

> sapat na pasilidad at malawakang edukasyon tungkol sa iba't ibang pamamaraan sa pagpapalano ng pamilya at pagbibigay ng espesyal na tuon sa ma-

*"RH Bill..." sundan sa pahina 11*

## Mga residente ng North Triangle, muling nagbarikada

MATAGUMPAY ang pagbibigo ng mga residente ng Sityo San Roque sa Barangay North Triangle sa Quezon City sa muling tangkang demolisyon sa kanilang lugar.

Noong Marso 15, muling nagbarikada ang mga residente sa paligid ng komunidad matapos ipag-utos ni Mayor Herbert Bautista ng Quezon City sa House Committee on Urban Planning and Development na isagawa ang demolisyon ng mga bahay sa lugar. Inilabas ang kautusan noon pang Marso 9.

Madaling araw pa lamang ng Marso 15, nagtayo na ng barikada ang mga residente. Pansamantalang hinarang ng mga kabataan ang kahabaan ng Epifanio Delos Santos Avenue (EDSA) malapit sa North Avenue. Dumating ang alas-12 ng tanghali pero walang dumating na *demolition team* kaya batid ng mga residente na nagtagumpay ang kanilang pagkilos.

Matatandaan na noong Setyembre 2010, tinangkang wasakin ang mga bahay sa komunidad para bigyangdaan ang pagtatayo ng Quezon City Central Business District (QC-CBD). Napigilan lamang ito dahil sa militansya at matinding paglaban ng mga residente.

Tinatayang aabot sa 25,000 na pamilya ang maapektuhan ng planong QC-CBD sa buong North Triangle at iba pang saklaw na lugar.

## Protesta sa kumpanya ng mga langis, inilunsad

NAGLUNSAD ng kilos-protesta ang mga kabataan at estudyante upang batikusin ang sunud-sunod na pagtaas ng presyo ng langis. Pinamunuan ng Anakbayan at League of Filipino Students (LFS) ang protesta sa tatlong malalaking kumpanya ng langis sa Makati City. Ayon sa Anakbayan, siyam na beses na nagtaas ang presyo ng krudo (katumbas ng ₱7.35 kada litro) habang siyam na beses ding nagtaas ang presyo ng gasolina (katumbas ng ₱6.50 kada litro). Sinabi rin nila na halos triple ang itinaas ng presyo ng langis mula noong 2001. Mula sa ₱13.82 kada litro noong 2001 ay sumirit na ito sa ₱46.05 kada litro ngayong taon.

Una nilang pinuntahan ang upisina ng Petron at kinalampag ang tarangkahan nito. Sinabi ng LFS na ayon sa pag-aaral ay *overpriced* nang ₱7.00 ang presyo ng lokal na mga produktong petrolyo. Kasunod nilang pinuntahan ang upisina ng Pilipinas Shell kung saan marahas na binuwag ang kanilang hanay ng mga elemento ng Makati Police at gwardiya ng kumpanya. Huli nilang tinungo ang upisina ng Chevron kung saan kinalampag din nila ang tarangkahan ng kumpanya. Ayon pa sa LFS, kontrolado talaga ng mga dayuhang kapitalista ang buhay ng mga Pilipino. Patunay dito ang pagdikta ng mga ito sa presyo ng langis.

Samantala, hinamon naman ni Anakapwis Rep. Rafael "Ka Paeng" Mariano ang guberno na bigyang-pansin ang panukalang batas na inihain ng Anakpawis na nagbabasura sa Oil Deregulation Law (House Bill 4317). Ayon kay Mariano, sa halos isang dekadang implementasyon ng deregulasyon, tanging mga dayuhang kartel ng langis ang nakinabang sa batas na ito. Pinasan ng mamamayan hindi lamang ang presyo ng langis kundi ang epekto ng mga ito sa presyo ng mga pangunahing bilihin. Anila, dapat nang simulang talakayin ng Kongreso ang HB 4317 at maglatag ng alternatibong solusyon sa patakarnn hinggil sa langis, dagdag pa ni Mariano.

Nakatakda ang malaking pagkilos ng iba't ibang sektor sa darating na Marso 31 laban sa Oil Price Hike. Nagpatikim na rin ng tigil-pasada sa ilang bahagi ng Bikol ang mga drayber at opereytor noong Marso 16.

### "RH Bill..." mula pahina 10

hihirap na pamilya at mag-asawang walang sapat na rekursong para sa anumang serbisyong pangkalusugan

> sapat na pasilidad at gamit at pagbibigay ng espesyal na rekursong para sa mga bagong panganak at kanilang mga sanggol sa panahon ng mga kalamidad at iba pang sakuna.

> pagbibigay ng Philhealth ng maksimum na benepisyo para sa malalalang kasong may kaugnayan sa *reproductive health* tulad ng HIV at AIDS, *breast* at *reproductive tract cancer*, kumplikasyon sa pagmemenopos at iba pa

> pag-abot sa kababaihan sa mga komunidad sa malalayong lugar na hindi na naaabot ng lokal na serbisyong pangkalusugan

> paglalakip ng edukasyon tungkol sa reproduksyon at sekswalidad sa mga kurikulum ng mga eskwelahan, mula ika-5 baitang hanggang ika-apat na taon ng hayskul

> pag-obliga sa mga pribadong kumpanya na galangin ang karapatan ng mga manggagawa sa usaping ito

> libreng serbisyong pangkalusugan at mga produkto para sa pinakamahirap na pamilya. **AB**

## Bidyo ng pagtortur sa mga rekrut na sundalo, lumalaganap

IBINUNYAG ng Isnayp, grupong multimidya ng rebolusyonaryong kilusan sa Bicol ang isang bidyo na nagpapakita ng paggamit ng tortur sa pagsasanay na isinasagawa ng AFP sa mga rekrut nitong sundalo. Ang 8½ minutong bidyo ay inilagay ng Isnayp sa Youtube noong Marso 17 at umiikot ngayon sa Facebook.

Ayon sa Isnayp, ang bidyo ay ibinigay sa kanila ng ilang dismayadong sundalo ng 9th ID ng Philippine Army na nakabase sa Kuta Elias Angeles, Camarines Sur. Ang 9th ID ang namumuno sa counterinsurgency operations sa rehiyon ng Bicol. Inamin ng 9th ID na ang bidyo ay kuha sa pagsasanay ng kanilang Training Unit.

Samantala, nanawagan ang Bagong Alyansang Makabayan ng imbestigasyon ang pagmamaltrato at paggamit ng tortur ng AFP sa mga sinasanay na rekrut na sundalo.

## Iligal na detensyon sa Central Visayas

ILIGAL na inaresto at idinetine ng mga tropa at upisyal ng Central Command ng AFP (CENTCOM) ang limang myembro ng Karapatan-Central Visayas noong Marso 19. Pilit ding kinuha ang isa nilang kasamang sugatan.

Ayon sa Karapatan, nakaengkwentro ng mga sundalo ng 79th IB ang pinaghihinalaan nilang mga Pulang mandirigma noong Marso 16 sa Sta. Catalina, Negros Oriental. Kinabukasan, nagtayo ng tsek-poynt ang mga sundalo. Noong Marso 19 ay kinumpronta ng militar ang limang boluntir na dumaan sa tsek-poynt sa Barangay Maganod, Santa Catalina. Sila ay sina Christopher Sollano, Althea Sollano, Welchester Paglinawan, Manuel Batilla at Erwin Sinangote, lahat taga-Cebu City. Kasama nila noon ang sugatang si Marvin Villegas na taga-Cebu City rin.

Ayon sa mga saksi, bigla umanong dumating ang isang puti na *van* at pilit isinakay dito si Villegas para dalhin daw sa isang ospital na di pinangalanan. Hindi pa rin inililitaw ng militar ang limang dinakip.

## Laban sa pagmimina sa Northeast Cagayan

MAHIGIT 4,000 mamamayan, karamihan mga magsasaka, ang lumahok sa isa sa pinakamalalaking demonstrasyong inilunsad sa Gonzaga at Sta. Teresita, Cagayan noong Marso 19. Ayon sa ulat ng National Democratic Front-Cagayan Valley, tinuligsa ng mga demonstrador ang pandarambong ng mga kumpanya sa pagmimina na Lianxing at Huaxia mula sa Taiwan.

Kabilang sa mga lumahok sa kilos-protesta ay mga magsasaka mula sa mga barangay ng Cabambanan Norte, Cabambanan Sur, Maguing, Isca, Flourishing, Progressive, Smart, Paradise, Batangan, Calayan, Minanga, Callao, Tapel, Rebecca, Baua, Sta. Cruz, San Jose, Cabiraoan at Pateng sa bayan ng Gonzaga; at Barangay Mision at Dungeg sa bayan ng Sta. Teresita.

Bago ito, mahigit 2,000 mamamayan ang lumahok sa isang rali kontra sa pagmimina sa sentro ng Gonzaga. Sinundan nito ang isang porum na dinaluhan ng mahigit 400 personalidad.

## Balikatan Exercises 2011, binatikos

IGINIIT ng Bagong Alyansang Makabayan (BAYAN) ang pagbabasura ng nakatakdang paglulunsad ng Balikatan Exercises 2011 sa pagitan ng mga sundalong Amerikano at mga pwersa ng Armed Forces of the Philippines.

Mahigit 6,000 sundalong Amerikano ang nakatakdang lumahok sa Balikatan Exercises sa darating na Abril 5-15. Isasagawa ang mga ito sa iba't ibang lugar sa Central at South Luzon.


Ayon kay Renato Reyes Jr. pangkalahatang-kalihim ng BAYAN, kailangang ihinto ng gubernong Aquino ang Balikatan 2011 upang bigyan-daan muna ang pagrepaso sa Visiting Forces

Agreement (VFA). Iginigiit ng BAYAN ang pagbabasura sa VFA na ginagamit ng mga sundalong Amerikano para makalusot sa paglabag sa mga batas ng bansa. Sa pamamagitan ng VFA, si Lance Corporal Daniel Smith na napatunayang nanggahasa kay Nicole noong 2005 sa Subic Bay Freeport ay nakalusot sa parusa at sa halip ay pinauwi sa US.

Tutol din ang BAYAN na ilun-

sad ang Balikatan Exercises na walang itinakdang bilang ng mga sundalong papasok sa bansa at mga operasyong kombatan hindi alam ng guberno. Magiging balon din ng korapsyon ang Balikatan kagaya ng mga anomalyang nabunyag tulad ng paglustay sa pondong ginamit sa mga nakaraang pagsasanay.

Aabusuhin din ng VFA ang pamamalagi ng sundalong Amerikano kagaya ng ginagawa nitong pananatili sa ilang bahagi ng Mindanao. Ito ay patunay na pagyurak sa soberanya ng bansa, giit pa ni Reyes.



ANG

Bayan

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLII Blg. 6  
Marso 21, 2011  
www.philippinerevolution.net

Editorial

## Kundenahin ang imperyalistang gerang agresyon sa Libya

**I**sang gerang agresyon laban sa bansang Libya ang inilunsad ng mga imperyalistang kapangyarihan. Walang pakundangan ang pag-yurak sa pambansang kasarinlan at karapatan ng mamamayan ng Libya na magpasya sa sarili nang isagawa ng US, France, United Kingdom at iba pang bansa ang pagpapaulan ng mga bomba sa syudad ng Benghazi nitong Marso 19 sa layuning pabagsakin ang rehimen ni Moammar Gadaffi.

Ang pambobomba ay isinagawa matapos ilabas ng UN Security Council ang resolusyon na pagbawalan ang paglipad sa himpapawid ng Libya. Binuo ang resolusyong iyon sa layuning hadlangan ang gubyernong Gadaffi na gapiin ang armadong pag-aaklas ng ilang rebeldeng grupong suportado ng US.

Sinimulan ang armadong pag-aaklas na ito noong kalagitnaan ng Pebrero. Sa suporta ng US, tinangkang sakyan ng mga armadong rebeldeng ito ang mga demokratikong kilos-protesta at malalaking demonstrasyon sa North Africa at Middle East at mag-upat ng mga katulad na paglaban sa Libya.

Matapos ang ilang linggo, nabigo ang mga ito na ulitin sa Libya ang mga dambuhalang demonstrasyon noong Enero at Pebrero sa Egypt at Tunisia na nagpabagsak sa mga guberno roon. Kalauanan, ang paglaban sa gubyernong Gadaffi ay nalimita sa pag-aaklas

ng maliliit na grupo ng mga armadong rebelde na naging madaling target ng kontra-opensiba ng mga pwersa ng guberno ni Gadaffi.

Matapos mapaatras ang mga armadong rebeldeng ito sa ilang kuta nito sa Benghazi, nagpasya ang US at ang mga imperyalistang bansa na tuwiran nang manghimasok at maglunsad ng gerang agresyon laban sa Libya. Sa unang larga ng imperyalistang gerang agresyon, nagpaulan ng daan-daang *missile* mula sa mga barkong pandigma na nakaistasyon sa Mediterranean Sea at nagpalipad ng mga *jet fighter* sa himpapawid ng Libya.

Matagal nang nais ng US na pabagsakin ang guberno ni Gadaffi. Ang gubyernong ito ay isa sa ilang guberno sa buong mundo na tumitindig

para sa pambansang kasarinlan at lumalaban sa imperyalistang patakaran ng globalisasyong neoliberal. Nagkakaisa ang mga imperyalista sa layuning wakasan ang paghahari ng gubyernong Gadaffi. Lahat ng mga imperyalistang bansa ay nakiisa at sumusuporta sa gerang agresyon at nag-aambag sa armadong pagsalakay sa Libya.

Sa kabilang panig, ang pagkakaisang ito ng mga imperyalista ay tanda rin ng kawalan nila ng tiwala sa isa't isa. Nag-uunahan ang mga imperyalistang kapangyarihan sa pagpwesto ng sarili bilang nakaiimpluwensyang kapangyarihan sa Libya sakaling magtagumpay ang layunin ng kanilang gerang agresyon na pabagsakin ang guberno ni Gadaffi.

Ang paglulunsad ng gerang agresyon sa



**Mga tampok sa isyung ito...**

Operation Odyssey  
Dawn PAHINA 3

Labanan ang rehimen-  
ng US-Aquino PAHINA 5

Ika-100 Araw ng  
Kababaihang  
Anakpawis, ginunita  
PAHINA 11

## Mga tuntunin sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*